

Co durablidad po sa pajar

Invista en l'industria da finanzas

■ (cp) Dacurt ha la «Cuminanza da lavur economia e societad» da la Partida cristiandemocratica (pcd) dal Grischun arranschà ina dieta sut il titel: «Durablidad en l'industria da finanzas – ina utopia?» L'anteriura presidenta da la bursa svizra SWX, Antoinette Hunziker-Ebnetter, oz CEO e partenaria-fundatura da «Forma Futura Invest SA» ha dà in sguard en l'industria da finanzas. En il referat ha Antoinette Hunziker-Ebnetter explitgà co il burdi da tschains tar ils stadis è creschì rasantamain il davos onn. Uschia ha la Germania pajà 42 milliardas euros be per il tschains d'obligaziuns statalas. Quai saja dapli che las expensas per l'infrastructura.

En Svizra saja la situaziun bler meglra pervi dal frain d'expensas tar far daivets tras il stadi. Da constatar saja – dapi ch'i dettia la crisa da finanzas 2007 – in creschament rasant dal volumen da daners. Da procurar quai sajan las bancas d'emissiun responsablas, fertant ch'ils emprests gjajan sur las bancas da fatschentas. Tar dar credits tras las bancas da fatschenta po la durablidad da deponer daners vegnir influenzada qua tras che las bancas dattan credits favuraivels per projects cuzzaivels.

Il triangul magic

En connex cun ils usitads products da finanzas ha la referenta declerà l'uschenumnà triangul magic che sa definischa tenor segirezza, rendita e liquiditad. Igl è pussaivel d'augmentar massivamain la rendita e da tuttina garantir la segirezza. Suenter la crisa da finanzas sa mussi ch'ils vegls receipts dal sistem da finanziair en antiquads. Em-



Hans Geisseler, president da la «Cuminanza da lavur economia e societad», Antoinette Hunziker-Ebnetter, referenta e Silvia Casutt-Derungs, suprastanta da la numnada grupp da lavur da la pcd grischuna (da san.).

MAD

pè saja i d'introducir in nov sistem che ha da s'orientar segund durablidad. Tala è pussaivla tar il sistem da finanziair en ina interpresa. Latiers sajan dad integrar ils collavuratur, la strategia da fatschenta, products sco era societad e l'ambient. Per avair success èsi era d'integrar pussaivladads da carriera cun resguardar la cumpatibilitad da lavur tranter professiun e famiglia.

Ina strategia durabla dumonda era da resguardar duaivlamain la firma e dad analisar ils facturs positivs u negativs dals products. Positiv è da fixar il focus sin augmentar l'effizienz e

spargnar energia tras il svilup tecnologic e da timunar l'interpresa uschia ch'igl è er eticamain da responsar.

I dovera in sistem durabel

In sistem da finanziair durabel serva tant a la societad sco a l'ambient e na sulet a l'atgna finamira. Quel sa drizza tenor principis commensurads, transparents e realisabels e sa basa sin ina cultura da ristg responsabla. I basegna plinavant ina rama lianta ed effizienta per tuts participads e pussibiliteschas e pretenda era responsabladad.